



295  
إبداعات

# مِنْ غَيْرِ دُونِ لِيَر

شعر : تامر أنور





# من غير دويلير شعر

تامر أنور

1

وزارة الثقافة



## • هيئة التحرير •

مدير التحرير

محمود الحلواني

سكرتير التحرير

مدحت العيسوي

الآراء الواردة في هذا الكتاب لا تعبر بالضرورة عن توجه الهيئة  
بل تعبر عن رأي وتوجه المؤلف في المقام الأول.

• حقوق النشر والطباعة محفوظة للهيئة العامة لقصور الثقافة.  
• يحظر إعادة النشر أو النسخ أو الاقتباس بأية صورة إلا بإذن  
كتابي من الهيئة العامة لقصور الثقافة أو بالإشارة إلى المصدر.

سلسلة  
إبداعاتتصلرها  
الهيئة العامة لقصور الثقافة

رئيس مجلس الإدارة  
سعد عبد الرحمن  
أمين عام النشر  
محمد أبو المجد  
الإشراف العام  
صابحي موسى  
الإشراف الفني  
د. خالد سرور

• من غير دويلير  
• تامر أنور  
• الطبعة الأولى،  
الهيئة العامة لقصور الثقافة  
القاهرة - 2011م  
2012م، 12 × 9 سم  
• تصميم الغلاف: هكرى يونس  
• المراجعة اللغوية: شعبان ناجي  
سعاد عبد الحليم  
• رقم الإيداع، ٢٠١١/١٩٨٩٥  
• الترميم الدولي، ٩78-977-704-836-١  
• المرسلات،  
باسم / مدير التحرير  
على العنوان التالي، ١٦ شارع أمين  
سامي - قصر العيني القاهرة -  
رقم بريد ١١٥٦١  
ت، ٧٩٤٧٨٩١ (داخل ١٨٠)

• الطباعة والتشبيك،  
شركة الأمل للطباعة والنشر  
ت، 23904096

من غیر دوبلیر

---



## الإهداء

عصام محمود، محمد عطالله، سامح سكيرمة،

محمد ممدوح، أحمد عز العرب.....

سامحوني إذا لم أذكركم جميعا

إلى تامر أنور

لأزلت أذكرك مرغما

إليها

هذا الإهداء شر لا بد منه





بروفه

حتادی من غیردوبلیر

اطمن

لومت

شبحك حیفوز بالدور



دبانه

---



ورقة بتتقطع من قلبك  
شخا بيط  
أفكار بتعفن  
دبانة بتعف عليك ..  
زززز

مروحتك ف جحيم السقف  
بتلف الجدران حواليك  
وشيطانك الاخرس  
مشنوق بالديل

بيدور ..  
ومعاه دبّانة عنيده  
زززز

ف عروق القلم المكون  
الصهد بيجرى ..  
مروحتك  
بتشدك فوق ،  
بتقرب  
بت ..  
واللون الاحمر بيطرطش  
على وش الحيطه  
زززز

زيارة

---





بيدورٌ على عود كبريت  
وسيجارة حلمه المبلوله..  
بتولّع .  
بصوابع شمسه المحشوره  
بين القضبان !!  
مراياته السوده  
بتطفئ سجارته  
وبتعكس ضل القضبان  
على جردل مليون بنشادر  
مقلوبه على فار مذعور !!

بيقرقض أرضه المسجونه  
بيدورّ على عود كبريت  
على آخر علامات الوقت  
ف جدار الزنزانة الفاضيه  
أنفاسه مع نفّس الوحدة  
بتحاول ترسم  
ف وشوش ممسوحه !  
بتكشّر  
مع صوت الحارس ودخول النور  
على جحر الفار المذعور،  
الباب بيزيق  
وإيدين سجانّه المجهول  
ترميله زيارته الملفوفه  
ف ورق بالزيت  
وجواب مفتوح  
بيحاول يقرأ،  
ويدورّ على عود كبريت  
بيفك الورقه  
ويلاقى علبه كبريت  
وبيرسم ضحكة ف سنان الفار !!  
ويكمل حف

**وبيجرى**

---



- (مش عايزاك .. عايزاك .. زاك .. زاك)

بيدارى الشمعه

وبيجرى ف ممر اليوم

وصدى الأصوات الملعون

بيفتت

تماثيل منحوته ف خياله ،

ويسد طريقه ..

(مش عايزاك)

بيحاول ينسى ،

ويعدى ..

من فوق الوح المتكسر  
 بيدارى الشمعه  
 ويبجرى  
 وعقارب سودا بتجرى وراه  
 وتدود حواليه  
 أنفاسه بتسقط  
 الصوت أغير  
 - (فاشل .. فاشل ..)  
 وطريقه بيضيق  
 - (إطلع برّه .. برّه .. برّه)  
 بيسرع أكثر  
 والوح الثانى  
 بيسقط ورا ضهره ويتكسر  
 دقات القلب بتضرب قلبه  
 وصدى الأصوات الملعون  
 بيرخ عليه  
 - (مقدرش أساعدك .. ساعدك ..)  
 تماثيل تتفتت  
 - (كله إلا أنت .. أنت .. أنت)  
 ووشوش تتكسر  
 والفتحه  
 بتقرب منه  
 بينط يعدى

لليوم التالي  
ياخذ أنفاسه  
يتنهد  
ويدارى الشمعه .





بالتو

---



بالطو  
حزين مرفوع اليافه  
وطاقيّة صمت  
وجوانتى من غير بصمات ..  
- مش باين كان إيه جواه ؟ !  
نضارة عتمة  
بتدارى الوش  
والرعب ف عينهم  
بيحاصره ..  
الخوف العاصف  
بيكسرّ بابيه  
وبيفتح  
الشنطة السودا،

ويطير  
ألغاز مكتوبة وطلاسم ،  
مش باين كان إيه جوّاه ؟ !  
بالطو حزين هريان قدّامهم  
والرعب ف عينهم بيطارد  
أنفاسه بتجرى  
ووراها نباح  
وأثار رجلين  
معجونة بدم ،  
؟؟؟ و!!!!  
علامات بتشاور وتحذر  
بوجود ألغام  
والتلج بينبح  
ورا بالطو حزين  
وأثار رجلين ..  
معجونة بدم  
ونهاية اللعبة  
ف الحارة السد  
والنصر ف عينهم  
بيقرّب منه  
ويفك الـ . ياقه  
هاها هاها  
ملقوش ولا حاجه

الأمر

---



ماضى .. مضارع ..  
أمر ،  
حدد واختار الحالة  
الماضى وراك  
ومضارع حاضر على بابك  
مستنى الأمر  
بتحب الأمس  
وهدم الماضى المخطوطة فدولاب الشمس  
بتشدك لطفولة عمرك  
وبراءة أحزان امبارح ،  
العتة بتاكل أيامك  
وبلاطى البرد  
صورك بتزيف ضحكك

والذكرى  
 ما كنتش سعيده  
 مكسورة فإزاز براويزك  
 الخوف م الجأى  
 بيشد الماضى فالحاضر  
 وسريرك  
 بيلف الأوضة ويدور حواليك  
 وحصاد الماضى فوشوشهم  
 ببصّ عليك  
 وعيونهم بتبصّ لبعض .. وبتضحك ،  
 كل ما تيجى تمد إيديك  
 تُقلك بيشدك تحت  
 ويحبس صوتك قدامهم ،  
 صورك بتزيف ف الضحكه  
 والذكرى  
 ما كانتش  
 لساك بتدورع الماضى  
 ف صفيحه نفايات العقل ،  
 اخرج من تُقلك  
 استسلم للأمر

م

و

و

ت



قمر الموت

---



محنة  
عواميد النور  
بتبصّ عليك  
هربان الضل المذعور من بين رجلك  
وخطاوى الحلم المتكسر  
بتجر جر فيك ،  
وكلاب السكة المسعورة  
بتجر ديولها وتدارى  
وبتنبح ورا موت خطاويك  
مهجور الشارع فدعنيك  
والليلة  
اكتمل البدر

واتقفلت كل الأبواب ،  
وبيعوي الخوف  
بتخبط وإيديك .. بتنزل دم ،  
قفلوا الشبابيك  
الليلة كات ليلة الديب  
والناس في بيوت الخوف ،  
وحدك ضد المجهول  
بتنادى شبابيك النور ،  
مقفولة ف وشك أبوابهم  
بتداري البوح  
حشرة الصوت المنبوح  
تلهث أنفاسك وحدك ،  
ف ضلام الليل مع قمر الموت  
وأخيراً  
باب راح يفتح لك  
علشان تدّارى ،  
ابتسمت أنياب الجوع  
واترسمت ضحكة  
فدعنيك الحمرا

## قمر الموت ٢

---



القمر الليلادى بدر  
يعنى المفروض إنك تخرج  
كل رغباتك الدفينه  
وتتحول  
اقف قدام المرايه  
راقب أنيابك كويس وهى بتظهر  
وملامحك اللى بتزداد شراسة  
وضوافرك اللى بتطول  
وانت أساساً مشعر  
المشكلة الحقيقيه  
إزاي هتستغل قدراتك الجديده

هل حنتنقم من القطيع اللى كر شك  
عشان جريمة قتل معنوى ؟  
إنت معمלתهاش  
واللى القاتل الحقيقى فيها  
هو اللى ببيلغ عنك ف كل مره  
ويقبض المكافأه  
وللا حتمارس دورك الطبيعى  
وتشوف فريسة من إياهم  
مفيش وقت للتفكير  
إنزل للشارع وحتفرج  
الناس بتبص عليك وبتضحك  
شكلك بايخ جدا  
وإنت بتحاول ترعبهم ومش قادر  
أنا نفسى بضحك عليك  
وأنا شايفك ف المرايات وانعكاسات الفتارين  
وأنت بتزغرُ والناس مش فارقه معاها  
يظهر إن انت مش الوحيد اللى اتحول الليلادى  
أنا شايف كتير غيرك !!  
كل واحد فيهم حاطط إيده ف إيد الضحية  
وواخدها على البحر  
علشان الليل ستار  
والبحر أكبر م البير ،  
إحساسك بالليل .. والجوع .. والوحدة .. والأهم إحساسك بالفشل



بيخلوك تحس إن انت الديب الوحيد،  
الشارد عن القطيع  
مفيش قدامك دلوقتى  
غير إنك تستحضر بنت الجيران وهى بتنشّر  
والقنوات الفضائية إياها  
وتبص للقمر وتعوى  
أهى أى حاجة تحسسك بوجودك وخلص  
قبل القمر ما يختفى



## كلا كیت أول خضّة

«لقد وضعت حیاتى قبله عینک  
من أدناها إلى أقصاها ..  
من غیر أن أخفى عنک شیئا  
وهذا ما جعلک تجهلینى»  
«طاغور»



عَصَا

---



العضّة الأولى  
مبتوجعش  
خلي وريدك يستسلم  
سيبها تمص دفاك م الدم  
تتمنى تموت ولا تبقى شبيها  
تتمنى الرحمة  
ينتفض الحلم  
يخلص دمك  
ضحكات الموت اللي ف عينها  
على آخر نقطة بتمسحها  
من فوق شفايفها ،

بتطمّن قلبك برحيلها ،  
العضّة الأولى  
مبتوجعش  
العضّة الثانية  
والتالثة  
تقتل ف براءة أيامك  
وبتنقل موتها العايش ف عينيها  
لبراءة عينك ،  
طالت أنيابك  
وتابوتك قاعد مستنى ،  
يا عدو الشمس  
خفاش الليل العطشان  
محروم م الدم  
مقتولة  
يا بنات الليل  
مكتوبة ف ضحايا الليل ،  
الليل  
مملكته دلوقت  
وحزين الموت اللى ف عينك  
من فوق العرش  
وحشاك الشمس  
وأثار العضّة ف وريدك  
بتنادى بالتار لعينيك



بتفتش عنها ف لياليك  
والليل  
مبقاش فيه بنات ،  
والكل  
على إيدك مات  
ولقيتها ...  
على باب الحارة الخلفيه ،  
بتمص ف دم واحد تانى  
وبتضحك  
والليل  
بيضيقي  
نظرتكو لبعض  
خايفين من بعض  
والليل  
مايسعش اتنين  
.....



## العذراء والجدى

---



كان باب المرصد مقفول  
والطين الأبيض كان بالـ  
كلوة رجليها الزرقا،  
ويرسم .. بصمات صوابعها المبتوره  
والخط الأحمر يقطع  
قبل أمّا يموت  
الموت الشاحب يجمّد تمثال متحرك،  
والليل البارد يشقى نجوم  
قلبك بيخبط ..  
ويفتح مع باب المرصد،

ونزيف الماضى المقتول  
دخلت  
والتج بيزحف ف عينها  
والرعدة  
بتهز التمثال المكسور.  
جرحك كان نفس الجرح اللى ف عينها  
وبساط الليل الخروم  
مليان بنجوم  
وقصايد شعر  
نجمها مقفول  
وبيفتح جرح  
وبيقسم ف القلب اتنين  
عذراء البرج  
والحب العذارى المقتول  
وبتخلع صوفك  
والخطب القايد جواك  
بيدقنى عينها  
برجك بيقول بتحبك  
هتصدق؟؟  
اللون المهزوم ف عينها  
اليوم مش يومك  
يا برج التيس المخدوع  
ولقيتها هناك

كأت عأمة ف اللل البارء  
مع برآ الءوء .  
كان فآء بقاء  
وببلع منها العذراء  
والألآ النازف على باب المرصد  
بلموء .





عمى ألوان

---



شش...شش

اسمع

الصوت بيخروش،

امسح نضارة ودنك

دا الوقت الحالك في عنيك

مش عايز يمشى

وعصابتك

بعنيها الواحدة المليانة تراب

بتشق طريقك

وايديك ..

تسبح في العتمه على الفاضى،

الصوت بيخروش  
دقات الكعب المجهوله  
سكتت جنبك ،  
العطر الفايع بغرابته  
بيخدر قلبك  
مع ملمس إيدها الناعمه  
والصوت الساحر  
سامع ؟ !  
مبقتش لوحذك  
وطريقك بقى بين صوابعها  
وعصايتك ثقلت فى ايديك  
اكسرها  
الصوت الساحر  
بيجسد ملامحها  
فوق لوحة ليلك  
شمسك طلعت جواءك  
سلمت إيديك ومشيت  
بوصلة قلبك  
بتدور بجنون  
غواصتك  
ثبتت ف القاع  
والزيت المتسرب منها  
بيلوث بحر الظلمات

سامع أصوات !!؟  
أخشن من صوتها ،  
ريحة غريبة معجونة بعفن الأصوات  
والإيد الناعمة  
مخالبها بتنزع أحلامك  
بتحسس فوق الأمواج  
وعصايتك مبقتش معاك  
الصوت بيخروش  
شش.. شش..



مقاطيسيه

---





رجليك بتشدك  
وعنيك قدام  
الناس بتوسع لإيديك المتطبخ لونها  
بعطر الدم  
والموت اللي فدينيك ..  
رجليك بتشدك  
وتجرح عيونهم  
على وشم قفاك الملعون  
الناس بتوسع  
والذعر بيضحك ف عنيهم  
بعد أما تمر .  
خطوات بتموت

بشبات ،  
وعنيك قدام  
على حرف العالم وبداية متاهات الخوف ،  
بتوقف رجلك وتفوق  
ع المقتول منك بإيديك  
وأثار الجزمة المسحوره  
كات لسه وراك ،  
بتلف عنيك  
وبتعكس رجلك لبداية الخط ،  
الناس بتوسع  
وقصادك كان واحد جاى  
رجليه بتشده  
وعيونهم  
على وشم قفاه الملعون  
وأثار الجزمة المسحوره  
تخلص ف عينيها  
بتحاول تفهم  
وتقرب أكثر  
بص ف عينيها  
ركز ..  
نااااااام

برمودا

---



الكنز المدفون في الملح ،  
تنين الذهب المسحور ،  
وخريطة باللون الأصفر ،  
بتحط ف عينك  
حلم القرصان المهزوم ،  
الدقن الخضرا بتهرش وشك  
وتشد سواد الجلد المخطوط ع العين العورا  
خطاف الإيد المقطوعة  
بيلف الدفة  
والبوصلة  
كات واقفة شمال

«الكنز المدفون في الملح .. الكنز المدفون في الملح»

زعنفة الفك المسعور

بتطارد خوفك

والحلم البائس ،

البحر بيزأر

والموج ييمد يديه

وبياخذك

-٢-

حضان الأعماق

العتمة ،

قناديل البحر المطفئ

بتحوم حواليك

نفسك محبوس

والقفص الصدري

من غير ولا باب

بتقرب منك

وتشد إيديك

بتشوف الوش

وضفاير نارها المبلولة

بتنور ليك ،

-٣-

السطح .. النور

بتودّع ديلها

وعيونك  
مش ناسية الوش،  
- «الكنز المدفون ف الملح .. الكنز المدفون ف الملح»  
ومثلث موتك

مرسوم  
ف السفن الضايعة ف أحلامك  
- ٤ -

- «سفينة .. سفينة .. سفينة»  
لِمَ شرّاعك وارمى الهلب  
نط على القبر العايم  
حاسب  
زعنفة الخوف  
منتظرة  
بين الأمواج  
- «أبرك السقامات .. أبرك السقامات»  
- ٥ -

الموت .. الوهم  
طقم البحارة العضم  
بيفضى جيوبه،  
بتفتش عن أى حياة،  
وتقلب جثة قبطانهم  
على صدره  
مرسومة خريطتك

ومثلث موتك  
والسفن الضايعة،  
بيفتّح عينه  
ويشاور،  
وضباب الملح بيتلاشى،  
بتبص هناك،  
على سفن الوهم المسلويه  
وقراصنة جاين ف الوش،  
بترفر ف  
الراية السودا ف سفينتهم  
- عضمتين ووشها -



كلاكييت أول مرة

---



## فالانتاين

أمشير  
واقف يستقبل كيوبيد  
وينشف  
آخر نقطة مطرة  
فجناح الحب  
اليوم .. يومك  
وانت بترص الورد مع الدباديب  
على كام قلب أحمر  
جوه الفاترينة  
والقلب الأبيض  
مش لاقى مكان،

والعجلة قصاد الدكان  
لحظات وحنيداً  
خدمة توصيل الحب  
عناوين . . وأسامي كثير  
وقلوب ف كروت  
محطوة ف بوكيهات الورد  
كيوبيد

بيشد النيلة  
والعجلة بترسم ع الأسفلت سهام  
واتنين . . اتنين  
ماسكين إيد بعض  
وسباق السهم مع البدال  
شئ مش سهل  
عرقك مملوك للشمس  
وجادون القلب بينهج  
وأخيرا  
أول عنوان  
فتحت . . مدت لك إيدها :

merci

والقلب الأبيض إتلون  
مع لون شفايفها  
والبقشيش  
- متشكر . . عن إذ نك

زعابيب القلب  
بتغطي السكة  
واتنين . . اتنين  
كيوبيد والنبلة  
والعجلة وإنت  
- أمشير سعيد -



## غيبوبة

النبض طبيعى  
وحرارته ٣٧  
وعنیه بتبخلق فـالسقف  
الحالة خطيرة  
.....  
خرطوم النفس المقطوع  
بيخى الصوت،  
بيهلوس،  
وجهاز كشف الأحلام  
بيشاور..  
صفر.  
وبراقى الذكرى المعدومة

بتفتش  
ف حوارى الماضى المهجورة  
وخيال الناس  
كان ماشى بعيد...  
الحالة خطيرة  
والحل؟!  
«عملية زرع الأحلام»  
مطلوب متطوع  
شاورت وابتسمت  
وادتهم راسها

النبض ييجرى  
وحرارته..  
(٩٦)  
وعنيه بتكسر السقف،  
وجهاز كشف الأحلام  
بيولع



## إجابة

بتحبنى ؟ مبتحبنيش ..

بتحبنى ؟ مبت... ..

- ١ -

الجومة بتقطف

أوراق الوردة المرسومة ف شرايين القلب

والشوك بيرد على سؤالك

ودموع السقف المتنخور

بتغطى الأرض

وملاية الكنبه المقطوعة

الجومة العاجزة

بتحاول تمسح

وجدار الواقع مرسوم

بالقلم الجاف

-٢-

الأوضة بتضيّق

على ضوء جدرانها الذهبية ومخدة حرير

محشية بريش

ونعام الحلم الهربان

بخيال البنّت المحبوس

الكتب المتشالة فعينها

بتفر ملامحه .. وحروفه

الأوضة بتضيّق

على ضوء الدبلة اللّلى فإيده

وجدار مرسوم ..

بالقلم الجاف

..... صفر .....

يمكن؟؟؟

## بوم

- (لا انت ولا غيرك)  
بوم... بوم  
شواكيش بتدق  
- (مبفكرش في ده دلوقت)  
كدابة  
بتفكر  
لكن... بوم،  
واحد غيرك  
شواكيش بتدق  
وإيديها في إيديه  
وطبول الزفة كات بتدق  
بيشور البركان في القلب

وبيحذف حممه  
فستانها الأبيض  
بيجر الفرحة على الأرض،  
والشمع الوالع  
بينقُط  
على نفس الأرض.  
وخيالك بيحرك أبعد  
والعرق المغلى بينقُط  
مع صوت الزفة  
بوم.....

وأيديها في إيدِه  
والسلم تحت الرجلين  
مع قلبك  
وبتفتح بابك .. ويفتح بابِه  
مرآة حمام مكسورة  
بتبص عليك  
وصورتها في إيدك / كات هيّ في إيدِه  
شواكيش بتدق  
بتفك قميصك / بيشيل الطرحة  
بتبص في عينها / بيصوا لبعض  
- (لا انت ولا غيرك)  
كدابة

بتبوس الصورة / بيبوسها ،

- (مبفكرش ف ده دلوقت )

بوم ،

بيقرب منها

ووريدك بينط في إيدك

والعرق المغلى

بيشوّه وشك

بيقرب أكثر

بوووم

والموس الواقع من إيدك

بيعوم ف الدم



## فاصل ونموت





## حدوتة قبل الموت ٢

عزيزى المشاهد

عارف إن الكاميرا

مهزوزة شوية

آسف

قررت أسجل وبسرعة

متخافشى من عينى الحمرا ودقني

هاحكيلك

من أسبوع

قررت أتخلص منها

.....

كات دايمًا تخرج من قلبى وتمشى

بالليل فـالأوضه  
وتخط صورتها على الحيطه  
بتسيب الباب مفتوح  
وتغيب ....  
فـالضلمة  
....

عزيزى المشاهد  
زى ما شفت  
قطعت الصورة  
وقفلت الباب  
أخيراً  
قلبى بقى ملكى لوحدى  
.....

مش خدعه  
الصورة اللى قصادك دلوقتى  
هى صورتها  
كل ما أقطعها  
ترجع تانى  
....

عزيزى المشاهد  
أسبوع  
والباب مقفول  
وشبـحها اللى شنقته على الشجره

بيص ويضحك للشباك  
وصورتها بتكبر  
وتغطي الحيطه  
والسقف

.....

سامع؟!  
الكعب العالي بينقر دقة قلبي  
شايف إيدها  
بتعدى من وسط الباب

.....

عزيزى ال... مُشاهد  
مضطرب رأسيك  
اطمن  
لو عشت  
حتشوفنى أكيد  
في الحلقة الجاية.



## هنومة

وانت بتتفرج على فيلم (باب الحديد)  
متأثر بيوسف شاهين  
وقلبك بيعرج  
وعنيك بتمارس العادة السريه ع الجردل المليون  
بذكريات كتير عن هنومة  
اللى انت معلق صورها ف كل حته ع الحيطه  
الكل كان بيسأل :  
انت ليه اخترت الدور ده ؟ !  
مع إنك لو أبو سريع  
كنت هتعمل كل اللى ف نفسك  
- طبعا -

حاتقول إن انت اخترت الدور الأصعب  
ثم قناوى .. هو بطل الفيلم  
- والحقيقة -

هنومة هى اللى بتوزع الأدوار  
ماهو مش معقول حاتسيب فريد .. وتحبك  
مع إنك مديها الكرذان والديوان  
اللى ورثتهم عن مشاعرك اللى ماتت  
واضح جدا  
إن البنات اللى اسمها بيبتى  
بحرف ال هه

بيكون وجودهم مرتبط بالمصايب  
هنومة ، هند رستم ، ...  
حتى هيلين فى الإلياذه  
كات سبب الحرب  
« ليت هنداً أنجزتنا ما تعد »  
ده اللى انت بتكتشفه  
مع كل مرة بتشوف فيها  
مشهد المخزن

اللقطة ال masterscene

للقطر اللى بيدس أحلامك  
وأبو سريع اللى بيتغير ف كل مره  
بيكون المفاجأة !!  
ولإنك زهقت من كثر المفاجآت

(ومن البدلة اللي بتلبسها ف كل مرة ..  
يا عريس)

من غير ققط  
قررت إنك تحط حد للمهزلة دى  
إما إنك تقتل هنومة  
بس ساعتها مش حيكون لوجودك معنى  
أو تتخلص من عم مدبولى  
اللى دايمًا بيلبسك البدلة  
أو تطفى الفيلم !!





## قاطبة

اللحظة اللي بتحلم بيها  
طول عمرك  
وانت بتتجمع قدام الميكروفون  
وبتشكل  
على هيئة نجم  
وشعورك الطاغى بإنك  
أشعر شعراء الأرض « قاطبة »  
أخيراً  
انتصرت على الشعر اللي ضربك زمان  
بالألم  
واتهمك بإنك لقيط

زمانها مقطعة نفسها م العياط  
قدام التلفزيون  
للأسف

كل المخطات اللي انت بتطلع فيها  
مش بتيجي عندها  
مش ممكن هتصدق  
إن المجنون اللي كان دائماً  
بيمشي عكس اتجاه الشمس  
عشان يقعد في الضل  
يحب فيها  
هو النجم اللي بيلمع دلوقتي

.....

اللحظة اللي فيه الذكريات  
بتصقف وتملا القاعه  
قبل الكراسي الفاضيه  
ما تسيب المكان

## كلاكيٲ مش أول صدمة

---



## فلاش

بتنقُط

وانت بتبوس الشارع  
وتحطه بعينك على جنب  
حاسس إنك مانيكان  
بهدوم مبلولة

.....

بترخ عليك  
والجزمة بتضحك  
لرذاذ الحزن المهدور  
والرؤية يتمسح في إزاز العين  
عزف المزاريب  
مع أوبرا الرعد اللي في قلبك

صوت الدكاكين  
بتشطب بدرى  
والبار مفتوح  
والبرق فلاش على صورة بنت  
وعمود النور واقف مستنى  
تيجى العربية اللى حتركب فيها  
كان لازم تشتى  
مع إن الدنيا  
كانت صيف

## مواجهة

ضلين  
ع الصخرة السوداء اللي هناك  
قاعدين  
علي شط الشمس،  
الضل الأول  
مألوف لعنيك  
والخصلة الطائرة  
من تحت الطرحة المسنودة على الضل الثاني  
بتضيع  
مع لون الشمس الغرقانة .  
ف سواد البحر  
ضلين.. ف عنيك

وإيدين .. بتشبك بعض  
وعنين .. بتبص لبعض  
ضلين قايمين  
يدأرو ف بعض ..  
المرّة دى ..  
الإنكار  
مش هافيدي



## سيمفونية

بيانو عجوز  
بيكحكج  
على أول درجة فسلم حزنه  
(دووو)

.....

ابتدى ف العزف  
وصوابعه بترقص ع الآلة السوداء بجنون ،  
بيتهوفن جوه البرواز  
بيسد ودانه ويغمض  
والريح بتصفق ويا الشباك  
وتفر النوتة  
لحن حزين وشوية موت ..

ع الهادى  
( رى ى ى )  
ريحة برفان  
حاجب للرؤية  
- برفان مسيل للدموع -

كان لسه بيعزف  
وعنيها فدمعه  
وصوابعه بتتقل ..  
بهدوء  
( مى ى ى )  
كات واقفة بتمسح  
آخر نقطة فقلبه  
من نصل عنيتها  
شدت بصماتها  
من فوق الكاس،  
مسحت سم عنيتها بآخر رمش،  
قلبت صورة بيتهوفن للحيفة  
جرميتها الكاملة بترقص  
على جثة عازف مجنون  
ميت بالسكتة !  
على سلم حزنه المكسور  
( دو .. رى .. مى .. دو .. رى .. مى )

.....

مفتاح الصول كان عايز يعزف  
مين الجاني؟!  
وسرينة النجدة جريت ف ودانها  
أخخخ.....  
كات ناسية صورتها ف قلبه



كلا كيت آخر مرة

---



## عالم بدون تامر

### - عالم أول -

أهلا بيكي  
واحد.. اثنين  
شهيق.  
زفير.....  
اركبي شمس جديدة وعدّي  
ويّا خيوطها  
كوكب فاضى  
وقمر ميت  
قدّام عينك كوكب أزرق  
حبة أخضر فاتح واصفر

قربى أكثر  
صوت براكين ف جزر مهجوره  
تسبح جوة اللون الأزرق ،  
خشى غلافه الجوى بسرعه  
أهلاً بيكى ف عالم نفسك

.....

تصحى عيونك  
لما بتسمع أول رنة من تليفونك  
واحد منهم !!  
- مستنيكى  
- مش هتأخر

.....

نفس مدينتك  
عدى شوارعك  
بين أسراب النمل الزاحف  
الكلية !!

نفس الكرسي  
كان مستنى قرب السور  
بعثت رنة  
رد عليها  
- أهلاً بيكى

**فات ساعين**  
- آسفة لازم أمشى



- أشوفك بكره  
رحلة عودة لبيتك تانى  
ويا صحابك  
- قولى احكيلنا  
قالك إيه؟؟  
اضحكى نفس الضحكة وقولى .. نفس القصة  
عدى اليوم؟  
اطمننى؟!  
لسه زخيرة عينك  
حية  
افتحى درجك  
ورقة انقرضت  
فيها قصيدة كات بتقول :  
إنك هبة الحب الأول ،  
وإن عينيكي كنوز حرمان ،  
أى كلام  
قطعى وارمى  
شمس بتغرق .. ليل بيعوم  
كوكب تانى  
بالتأكيد  
بقى من غيرى  
عالم أجمل  
أهلا بيكى

## - عالم ثانى -

أقمار صناعيه  
بتجيب الصورة ،  
باب العالم  
حارة قديمة جنب الجامع  
زحمة القمة  
أب بيلعب دومينو هناك  
عركة بعيد ع الإمة الثانيه  
ستات بتبص من الشبابيك  
أخ بيجرى يشوف جرى إيه !!  
والأخ الثاني طلع البيت ،  
صناديق كرتون  
ورا باب الشقه  
محشية كتب  
برواز مشروخ وحواجه ثقيله  
محطوط ع الوحش ،  
أوضة اتقفلت ويا غيوم فـالسقف بتشتى  
قشرة وطوب  
فوق ع الكنبه  
فوق فرغوف مكتبتي الفاضيه  
والأدراج مفهاش ولا حاجه ،  
أخ بينزل بالصناديق  
والبرواز

وقع اتكسر  
بالتأكيد  
كان عالم  
أوسع

### - عالم ثالث -

عالم ضلمة  
سلم رملة  
وعمود النور  
مناخيره كبيرة  
وبيرمى بضل حواجهه الأرض  
أمطار حبرك  
بتغرق  
فبيوت الورق المتنية  
وشوارع قش  
أقلام  
تتدحرج ع الأرض  
والناس  
شكلها مألوف  
تشبه لمرايتك  
والأسود مرسوم فسماهم وبيوتهم وشوارع سد .  
كان ماشى بيضحك

وعمود النور مناخيره كبيره  
كات إيده ف جيبه  
بيصّ وراه  
وبيرمي حواجبه  
أحزانه  
مناخيره الضخمة  
فوشوش الناس  
والحبر يرخ ويغرق  
صورة اتمسحت  
والضحكة بتوسع على خده وشعاع النور،  
بالتأكيد  
كان تامر تانى

- 7 - برروفه .....  
 9 \* دبَّانَه .....  
 13 \* زيارَة .....  
 17 \* ويجرى .....  
 23 \* بالطو .....  
 27 \* الأمر .....  
 31 \* قمر الموت .....  
 35 \* قمر الموت ٢ .....  
 41 \* كلاكيت أول خضَة .....  
 43 \* عضَة .....  
 49 \* العذراء والجدى .....  
 55 \* عمى ألوان .....  
 61 \* مغناطيسيّه .....  
 65 \* برمودا .....  
 71 \* كلاكيت أول مرة .....  
 73 - فالانتاين .....

77	- غيبوبة .....
79	- إجابة .....
81	- يوم .....
85	* فاصل ونموت .....
87	- حدودة قبل الموت ٢ .....
91	- هنومة .....
95	- قاطبة .....
97	* كلاكيت مش أول صدمة .....
99	- فلاش .....
101	- مواجهة .....
103	- سيمفونية .....
107	* كلاكيت آخر مرة .....
109	- عالم بدون تامر .....

### للنشر في السلسلة :

- \* يتقدم الكاتب بنسختين من الكتاب على أن يكون مكتوباً على الكمبيوتر أو الآلة الكاتبة أو بخط واضح مقروء . ويفضل أن يرفق معه أسطوانة (C.D) أو ديسك مسجلاً عليه العمل إن أمكن .
- \* يقدم الكاتب أو المحقق أو المترجم سيرة ذاتية مختصرة تضم بياناته الشخصية وأعماله المطبوعة .
- \* السلسلة غير ملزمة برد النسخ المقدمة إليها سواء طُبِع الكتاب أم لم يطبع .





صدر مؤخرًا من سلسلة

إبداعات

- 283- هل كان خطأ؟ ..... عبدالرحيم عبدالهادي
- 284- فضاءات مدينة ..... رضا صالح
- 285- أضحك.. كحفرة واسعة ..... خالد حسان
- 286- ما عادتش بتجيلك ..... مصطفى جوهر
- 287- تعاود عزلتها.. والرحيل ..... سحر عبد المجيد
- 288- عين سحرية ..... وسام جابر النبي الخلو
- 289- ثعبان يبحث عن مشط ..... محمد محمد مستجاب
- 290- حالات أخرى للغياب ..... محمد محمد نصر
- 291- لمن الحزن اليوم؟ ..... أحمد صلاح كامل
- 292- طيرنسى ..... فتحي أبو الجند
- 293- هزيمتين... وأوصل ..... إبراهيم رفاعي
- 294- قلم نونو ..... فتحي حمد الله
- 295- ٣ أغاني للسعادة ..... أحمد عبد الحميد





اللحظه اللى بتحلم بيها ..

طول عمرك

وانت بتتجمع قدام الميكروفون ..

وبتتشكل ..

على هيئة نجم

وشعورك الطاغى بانك

أشعر شعراء الأرض

أخيرا ..

انتصرت على الشعر اللى ضربك زمان ..

بالألم

واتهمك بانك لقيط .

Bibliotheca Alexandrina



1167402



www.gocp.gov.eg

www.qatrelnada.com.eg

www.odabaaelaqaleem.com

www.althaqafahalgadidah.com.eg

تصميم الغلاف : فكري يونس

الشمس : جديهان